

# «Ün sguard vers il futur»

Il Museum Stamparia Strada organisescha mincha duos ons üna nouva exposiziun speciala

**La stamparia a Strada festagescha quist on seis 30avel giubileum. Per quist motiv ha la Fundaziun Stamparia Strada arrandschà in venderdi passà üna festa in collavuraziun cul lavuratori dals Fränzlis da Tschlin.**

«La tschiculatta sto gnir s-chodada sün üna tscherta temperatura», declera Theodor Gut, el es ün dals commembers da la Fundaziun Stamparia Strada. Blera glied sta intuorn la maisa, e guarda impreschiunada süllas duos maschinas chi stan sülla maisa. Dad üna vart sta ün stampader da trais dimensiuns, chi'd es güsta landervia da stampar üna figüra, chi ha la fourma d'üna tschuetta. E da tschella vart sta ün stampader da tschiculatta. «Che motiv laina stampar?», dumonda Theodor Gut als preschaints. La tschiculatta es intanta gnüda liquida ed el tilla ha implida illa maschina. «Co füssa cun ün cour?», propuona üna visitadura dal Museum Stamparia Strada. Gut da dal cheu e schmachà sü'l pom chi sta sü «heart». Subit as metta il stampader in movimaint e be ün pèr minuts plü tard pon las visitaduras e'ls visitaduors contemplar il cour da tschiculatta. Ingon festagescha la Stamparia Strada seis 30avel giubileum. Pervi da quai s'haja organisà in venderdi passà üna festa cun tschaina, bal e cul concert da finischiun dal lavuratori dals Fränzlis da Tschlin. Il



**Ils visitaduors da l'exposiziun speciala sun fich fascinats dal stampader da trais dimensiuns.**

fotografia: Muriel Wolfisberg

Museum Stamparia Strada organisescha eir mincha duos ons ün'exposiziun speciala. Pels ons 2018 e 2019 es il tema da l'exposiziun speciala «La stampa da trais dimensiuns: Co ch'üna tecnologia müda la vita».

## **Dürant 200 ons üna stamparia**

Johannes Gutenberg vaglia sco'l inventader da la stamparia moderna. Cun l'adöver da custabs movibels s'haja pudü as distachar da l'on 1450 da la veglia metoda da stampar cudeschs: Nempè da scriver giò tuot a man. Circa davo

100 ons es quel möd da stampar lura finalmaing rivà in Engiadina. Da quel temp d'eira l'Engiadina amo catolica, lura esa gnü vuschà in plüs cumüns da gnir refuormà. Cun quai es gnüda promovüda la stamparia eir in Engiadina. L'istorgia dal Museum Stamparia Strada svesa va inavo fin da l'on 1689. Da quel on ha Nuot Cla Janett installà üna stamparia illa chasa a Strada. «Quella stamparia d'eira vairamaing üna stamparia ed üna chasa cun stalla in üna», declera Theodor Gut. In quella chasa es gnüda stampada üna gronda quan-

tità dad importants cudeschs istorics-culturalis e per gronda part in rumantsch. Eir la gazetta «Il Progress» es gnüda stampada illa Stamparia a Strada. Da l'on 1818 es gnüda datta inavant la chasa ed uschea eir la stamparia a la famiglia S-charplaz. Quella famiglia ha tgnü la stamparia in funcziun fin l'on 1881. Davo cha l'ultim abitant d'eira mort es la chasa gnüda surdatta ad üna fundaziun culla mera da mantgnair la stamparia. Tras l'ingeschamaint dal cumün da Tschlin, il chantun Grischun e la Confederaziun s'haja pudü renovar la chasa. Grazcha a Hans Kobler, chi ha ramassà ils mezs finansials, s'haja realisà our da la stamparia veglia ün museum.

## **Stampader da trais dimensiuns**

Dürant ils mais mai fin october ha il Museum Stamparia Strada avert mincha sonda. Dürant ils mais lügl ed avuost eir amo la gövgia. Els organiseschan eir adüna darcheu exposiziuns specialas chi restan lura per duos ons. A chaschun dal giubileum da 30 ons han ils respunsabels da la Fundaziun Stamparia Strada decis da dar ün sguard in l'avegnir da la stampa da trais dimensiuns. L'exposiziun permanenta muossa co chi gniva tipografà e stampà dal 17avel fin i'l 19 avel tschientiner. Tras quai cha la stamparia d'eira eir üna chasa cun stalla han ils visitaduors la pussibilità da s'far ün purtret co cha'ls umans vivaivan plü bod. Pels ons 2018 e 2019 es l'exposiziun permanenta gnüda cumplettada cun robas our da la stampa da trais di-

mensiuons. Uschè as poja per exaimpel congualar ün vasch antic cun ün vasch chi'd es gnü stampà culla tecnica da trais dimensiuns. La grond'attracziun es actualmaing il stampader da tschiculatta. «L'exposiziun speciala svaglia l'interess pro la glied», disch Georg Häfner, il president da la Fundaziun Stamparia Strada, «fin uossa vaina gnü blera glied chi'd es gnüda a verer l'exposiziun». Tanter da quels sajan adüna darcheu eir stats poligrafis, tipografis o stampaduors. (anr/mw)

[www.stamparia.ch](http://www.stamparia.ch)

## **Arrandschamaint**

## **Film dals tschiainders illa Gravacultura**

**Susch** In venderdi, ils 3 avuost, a las 19.30, muossa la Gravacultura a Susch il fim «unerhört jenisch». In quist film giova Stephan Eicher la rolla dal tschiainder e tschercha insembel cun seis frar Erich lur ragischs da famiglia. Lur tschercha tils maina illas muntognas grischunas pro las familias emigradas Moser, Waser e Kolleger e lur dun da musica. Quistas familias vivan cun paschiun ed in möd fascinant la tradiziun musicala chi ha fuormà la scena da la musica populara in Svizra. La gruppa «Bündner Spitzbueba» accompagna la sairada da film musicalmaing. (protr.)